

四庫全書

集部

欽定四庫全書

集部

五百家播芳大全文粹卷十三

四三

詳校官編修<sub>臣</sub>謝振定

助教<sub>臣</sub>常循覆勘

總校官編修<sub>臣</sub>王燕緒

校對官中書<sub>臣</sub>葉蘭

謄錄監生<sub>臣</sub>馬衍宗

欽定四庫全書

五百家播芳大全文粹卷十三

宋 魏齊賢

葉 棻同輯

賀啟

貳卿

吏侍  
工侍

戶侍

禮侍

兵侍

刑侍

賀林吏侍啟

周子充

伏審顯膺帝制擢貳天官當循名責實之朝任激濁揚

清之柄士林歸望從索增華恭惟某官盛德在人高名  
映世引君當道盡居仁由義之心言古驗今富博物洽  
聞之學早躅清雲之路寢深丹宸之知十道恩威肅擁  
皇華之重中臺綱轄允資成務之賢考嘉績於丕昭見  
遠猷於已試果進甘泉之列遂專小宰之權惟九流人  
物之凡必區以有別矧六典邦家之要時舉而自行非  
明一代之憲章曷足寄四銓之刀尺山濤在晉灼知啟  
事之公行儉居唐詎致長名之濫某晚窺崇伋遠托餘

光徒懷株守之安莫展厦成之慶欣聞善類得清鑒於  
陽秋俯與蒼生待至和於霖雨

賀凌吏侍啟

黃仲秉

伏審中宸錫命前席需賢蒙潤神京久殿長安之三輔  
陞華仙禁首膺文昌之六聯注倚方隆流品自肅竊以  
王畿近甸之劇或當輟侍從之臣天官小宰之崇尤宜  
得豪傑之士宣化雖煩於久外告猷允藉於居中恭惟  
吏部侍郎毓粹自天研幾於聖奏篇文陞夙高晁董之

欽定四庫全書

五百家補遺大全文粹  
卷十三

二

才載筆史垣更擅荀袁之體暫假麾於臨汝亟移鎮於宛陵眷言選部之繁宜得禁途之舊四頒細札召寘都臺方將陳善閉邪納君於唐虞之盛豈止揚清激濁審官如裴馬之能某幸託餘休欣傳成命把繡衣而問俗方自愧於非才賜金鑑以表清願薦承於新渥

賀吳吏侍啟

耿元鼎

京兆均勞被紫宸之新命甘泉席寵還碧落之舊班時知物論之攸歸士識上心之所望向榮光而燭日騰喜

氣以浮春諒惟慶慰恭以某官稽古道隆佐王畧茂草  
踐高華之妙選藹聞直諒之休聲稍乘御史之驄常落  
金吾之膽陸公仁義未妨錢穀之知賈誼治安纔奉鬼  
神之對謂立當於要路俄勇退於急流使寒谷生春制  
閩牧稽山之郡免鄰國為壑下車䟽鑑水之坡方興黃  
谷之謠已蒙丹鳳之詔連升夕拜進陟天官欲田野之  
間無嘆愁必輦轂之下先彈壓追前趙後張之政須左  
禹右臯之才從朱轂之兩轡聊屈勤於妙手冠黃閣之

三輔合歸侍於清光果繇報政之功復拜銓曹之長對  
揚天子想班居玉筍之前圖任舊人看名出金甌之下  
某早蒙英眄方仰光躋屬盛事之傳聞欲中宵而起舞  
駑馬十駕尚煩鞭策之加廣廈萬間永幸悝懽之託

賀凌吏侍啟

趙彥瑞

顯膺帝制進擢天官正臣來歸識者相慶恭惟某官學  
該邃古文冠清流退以潔身自養經綸之用進而論事  
不知富貴之榮一違軒陛之嚴屢最藩宣之課道不容



而乃大名輔實而益高與夫自葉流根遠借四方之助  
曷若以人為鑑近承三接之光果奉賜環遂膺簪筆君  
子在內自然表著之尊大匠掄才當出銓衡之外某論  
交有素聞命增歡江海寢疎分隔文昌之步雲龍方際  
佇霑霖雨之私

賀沈吏侍啟

代

熊子復

伏審妙簡清衷薦游華禁若時交舊復分職于中臺乃  
命為真肇正儀於亞旅訓辭深切班列清明竊以文昌

政事之本源莫高選部法從朝廷之羽翼尤貴二卿惟已試之效則流品自清必久次之英則號名乃正眷焉任重允也難才恭惟吏部侍郎蘊藉醇深規模闊遠故家遺俗累世猶存進士宏詞兩科連中貴名起乎日月新渥照乎乾坤綸掖重陞既演商周盤誥之妙銓曹再踐將履唐虞黜陟之公某猥系亢宗濫膺煩使如小子之在吾黨每荷於眷私知同姓之異他人尚期於汲引逖傳顯命倍激歡心銓總無私姑揚名於裴馬機衡有

待旋接武於夔龍

賀葉戶侍啟

王民瞻

使指昭孚宸綸趣覲從九府進貳六官真賢登庸有  
識胥慶竊以治道莫先於裕國人才猶貴乎適時蓋國  
用不足雖苟安而未可尚何以求大功時變不通雖小  
試而莫稱尚何以頒遠用恭惟聖君所以圖治拳拳之  
深意正以邦計未有綽綽餘裕之成謀特以中外詳試  
之聯以求通達能濟之士意之所屬用豈徒然恭惟某

官能鉅而材宏識高而量遠居常議論不為落落之虛  
言凡所踐更莫不殫殫而可紀惟望實久馳於士夫之  
表而謀謨適契於天子之衷宜是超遷益深眷注嘗謂  
錢穀甲兵之間所當講於安平無事之時正惟言語侍  
從之臣非特以簿書不報為恥故下焉則宜明歛散以  
寬民力上焉則惟審取予以益邦儲苟蠹弊之源盡塞  
其隙則財用之出坐見其饒想嘉謨嘉猷無以易此計  
立政立事我其尸之適觀厥成啓佑乃辟某居慙固陋

夙奉使令聞明制之初頒倍常情而增喜羈窮自繫既未遑尾下客以前趨悃悞之私尚庶幾假單詞以叙見

賀李戶侍啟

沈德和

趨承天詔還貳地官雖佐王五教之數人由求舊而去國期年之久命則維新宿望來歸輿情胥悅恭惟某官學根經術政號吏師勤勞有為而忠不辭難酬酢萬變而事無遺慮布宣寬大仲山久擅於將明操制羸虛劉晏益知於取予屬時底治為國遠圖顧世業壞為并兼

未能復古然仁政必以經界宜以御令將令阡陌之餘  
坐獲井田之利逮茲再舉遂都一新考均土於周官既  
符令典法富民於漢相即慶成功其遠總轉輸欣聞渙  
汗車煩馬殆莫收外府之饒貫朽粟陳徒仰大農之盛  
依歸之始叙詠奚殫

賀宋戶侍啟

吳仲權

肅奉宸綸擢司邦計立政立事爰資經濟之才足食足  
兵實藉幹旋之術郵音四達士氣增歡竊以建官惟賢

莫重文昌之六職裕民以政尤先地官之貳卿兼推愛  
物之仁洞曉理財之義佐大司徒之治素號劇曹領少  
常伯之名斯為清選果聞進用允屬雋良恭惟某官肅  
哲凝姿剛方植操學該載籍又尚論於古人識貫羣倫  
將兼善於天下所臨必最無施不宜自結主知益攄賢  
業翱翔蘭省富哉倉庾之儲裨贊槐庭偉矣經衡之助  
朋來異數進陟近班李元紘時政有聞已見賜衣之寵  
竒章公清德足尚佇觀命相之榮僉論攸歸斯言可必

其素承眊昧獲被聲容邈去崇墉彌積三秋之永遙瞻  
英表豈勝千里之懷

賀趙戶侍啟

熊子復

伏審輟從天邑擢佐地官上簡帝心無越宗英之望下  
蘇民力有嚴邦計之權是增屬籍之光豈特禁途之盛  
竊以洪範八政食貨是先水衡九官錢帛為急自古資  
為經費於今職在版曹雖崇儉去奢本躬行於聖主而  
量入為出藉心計於良臣恭惟判部侍郎問學精微行



能高妙挺出神明之冑蔚為邦國之華周旋振振望固  
推於標的商邑翼翼化豈決於本原遂分職於大農爰  
進班於亞旅孟軻將有利國必陳仁義之言冉求可使  
足民不忘禮樂之事某猥分偏壘阻拜崇墉錢穀之問  
不至於廟堂暫煩獻納宰相之賢有出於宗室佇任弼  
諧

賀錢戶侍啟

侯彥嘉

王廷揚命民部選賢弼五服以至五千輿圖是寄式六

官而屬六十從索有輝凡暨速郵翕然交譽某官高明  
性稟忠孝家傳鄧氏世侯東京莫與為比裴公居位四  
海不謂以親久矣外遷從茲朋陟榮解藩宣之政進專  
經費之權貨財本末源流固資餘地朝夕論思獻納方  
倚多聞少假禁途即梯公路某偶司近郡夙聽新除東  
塾序賓阻厯階除之次尺書贊喜徒塵几案之間

賀

闕

戶侍啟

鄭少嘉

顯膺綸綍進陟版圖冕旒樂在於與賢簪佩聳聞而增

氣為時所重稽古為榮恭惟判部侍郎先生乾坤毓靈  
海岳標異傳孔子顏孟之道誠明蓋得於中庸蘊公孫  
晁董之才功業可見其施設揚簡要清通之譽結螭蛭  
蠖濩之知惟司元少常伯之權乃地官小司徒之職精  
擇其堪為者進獻何獨無之於今選賢故以重崔羣之  
命無何議相諒首可僧孺之名某竊食海隅承恩寧下  
跂矚顯制喜溢重衿江山相遼莫陪賀客之後竿牘無  
益聊効小夫之勤

賀吳戶侍啟

周子充

伏審榮奉贊書擢陞計省雖孟子七篇首闢言利乃賢  
哲之本心然周官一部半繫理財亦國家之先務民要  
資其蘇息帝聊試其緒餘郵報初傳輿情胥悅竊以戎  
索未靖無財士固不來邦維不張有粟吾焉得食是故  
寧死而詎可去信將富而必先為仁慕古之人縱稷契不妨自  
比居今之世雖管晏又何足為恭惟判部侍郎問學精  
微行能高妙早由簡拔多所踐駁輟使傳於王畿陞從

班於民部方當考祖宗經久之模而制國用安肯效漢唐權宜之策而佐軍興佇契淵衷遂膺柄任某猥將漕指逖聽除音徒欣廣廈之成莫展崇墉之慶

賀韓戶侍啟

陳阜卿

伏審顯膺帝制還總地官申錫詔書明諭德意上恩至渥輿論有光恭惟某官行能並高學術兼富出入更踐為時老成論議忠嘉有古風烈力求便郡以奉親輿惟邦計之甚繁仰聖心之猶屬蓋理財實周公之所學謂

富民非千秋其誰宜載錫寵章復還重任實自忠獻四  
時皆總於計司歷數搢紳一門獨專於盛事行登黃閣  
盡繼青氈盡收陳列之功大慰具瞻之望某少慚妄作  
老因卑飛墮筦庫者十年萃拙藉於一已惟是久塵於  
眷獎足以自慰於衰朽竊有待於吹噓冀少逢於枯藁  
其為瞻頌未易究宣

賀秦禮侍啟

張全真

伏審光奉溫綸益隆異數益繇稱職爰昭因任之宜即

所居官誕拜為真之寵自開除目靡不甘心恭惟某官  
道德淵源智畧輻湊視儒者以百數經義獨高課甲科  
其幾人策名第一式從衆舉俾貳春官凡所建明率遵  
周典之舊不為疏濶盡存漢制之詳本乎六藝之文以  
定一王之法學師於古文便於今顧可見之事功其有  
試矣使遂正其祿秩何以假為繫此殊恩無煩滿歲維  
太師常掌是禮而侍郎今貳春官父子一朝規模百世  
上扶真主知皇帝之彌尊下逮斯民歎官儀之復見某

自惟鄙陋猥辱知憐雖翻倒喜心有不假寐而形容盛  
德曾弗能文更俟登庸以慰期望

賀呂禮侍啟

熊子復

伏審輟繇螭陛擢貳烏臺賜細絲之十行曾未乾於制  
墨典秩宗之三禮遽又改於除音宸眷甚優輿情胥慶  
竊以禮緣時制雖云損益之可知道待人行每嗟文獻  
之不足考世系孰高於宰相得老成因重於典刑益述  
作規模其故家猶有存者而儒雅緣飾豈俗吏所能為



之恭惟判部侍郎毓粹自天研幾於聖故國非謂喬木  
紹世業於韋平學者仰如泰山極師資於游夏早膺簡  
拔多所踐馭比從左掖之華進任南床之峻然柱後惠  
文之治難屈於老儒豈野外綿蕞之儀可雜於昭代肆  
改弁於宗伯俾考正於舊章洵睹殊遷佇升台席阻陪  
賓客之趨曷深寤寐之喜

賀周禮侍啟

朱節之

伏審親簡嗣皇真除亞旅中臺典禮既咨儒者之宗內

禁代言仍屬辭人之伯朝紳倚重從橐增光竊以稽古  
禮文莫清於是職為時輔相多進於此途若司馬公之  
定典儀如歐陽子之掌誥命卓爾異時之冠蔚為大用  
之階邈前後以相望曠古今而僅有恭惟判部直院侍  
郎妙宗道壺雄帥文壇節獨貫於險夷塗兩更於滯  
西垣魚直舊哦紅藥之翻東觀並游首挹青藜之照已  
預裁於七制乃登踐於六聯豈徒綿絕於漢儀正資潤  
色於鄭命仰見平時之筆陣獨掃千軍坐令今日之文

風炳同三代方結穆清之眷即陪宥密之籌某猥試冷  
曹聳傳溫制構櫨短植尚依仙宇之摩空緋纚輕帆或  
附神州之濟海

賀趙禮侍啟

翟公巽

伏審上佇辰猷中勤晝接六聯近綴尤妙選於秩宗兩  
禁舊游宜真除於亞旅輿情胥慶瑰望愈隆竊以商周  
百世可知禮固緣時而制齊魯二生不能道實待人而  
行茲既趣於旋歸果遂叅於述作恭惟判部侍郎氣嚴

而中裕體邃而外冲早由蜀道而來特出漢廷之右代  
言西掖諸老先生所未能將命朔庭雖古虜使而猶劣  
三年去國萬里還朝惟爾雅之文章已施於詒命而先  
進之禮樂當藉於論思豈同叔孫綿絕於漢儀猶勝燕  
公粉澤於唐代佇循舊制擢亞中階某幸託餘休欣傳  
成命鋪張揚厲願益展於稷容輔贊彌縫將晉陪於機  
務

賀周兵侍郎啟

耿元鼎

伏審光被召恩榮歸邇列當偃第休兵之始佐司馬以  
制軍備簪筆持橐之班筵屬車而陪論蔽自一人之眷  
驪形四海之傳恭惟判部侍郎直道事君正心格物早  
自結顛卬之瞻嘗荐揚清切之班非道弗由有猷必告  
周旋五院真能落膽於金吾洞悟九重益信簡心於上  
帝蔑取容容之福專圖諤諤之昌俄帝治於中臺善平  
銓於小宰特躋遠用連殿近藩列岫窓中方快爭先之  
觀三衢陌上已喧來暮之歌迄用報成適當圖舊天如

欲治也舍孟子以其誰帝自謂過之思賈生而不見輟  
前召南之愛付予圻父之權矧交脩玉敦之前盟思大  
建金城之長策戒不虞而除戎器豈惟備先具於一時  
及其暇以明政刑庶可折遐衝於萬里究觀賢業陞踐  
政途某早幸登門尤深賀厦有是文者武必備進有德  
則朝可尊得結輩十數公諒慶陳於丹悃取武成二三  
策期永輔於皇圖慶忭惟深敷陳曷既

賀湯兵侍郎啟

胡長文

寵奉宸綸榮陞禁路進總司戎之政蔚為法從之光凡  
在庠休舉增欣忭伏惟某官鼎鐘偉量韶濩正音德茂  
中庸師聖賢之有法才優通變應機務以無方自峻擢  
於巍科頗倦游於常調守道難進得時則行彈擊百僚  
獨聳烏臺之望徘徊九列聿脩扈正之官輟卿月於金  
門耀使星於玉壘七年夙夜一節險夷惟東西久宿  
於師屯故上下俱疲於饋餉帝心憂顧天詔哀矜爰遴  
選於通儒俾典司於大計輕徭薄賦蠲重斂者不知幾

科足食成軍儲羨財而更豐他日兵民兼裕官吏舉安  
頌聲上達於四聰歸覲果膺於三接對揚慷慨褒諭頻  
煩遂以一世之名儒並擢九重之近侍論思獻納已高  
持橐之風輔贊彌縫行副秉鈞之任某遠聞新命喜極  
卑情無從進旅於門牆以陪賀列但與去思之郡邑同  
詠恩深

賀周兵侍啟

翟公巽

伏審趨近清光寵膺華渚總侂人之重久屈殿於輔藩



居亞父之尊果復還於禁路郵傳四出頌歎一新竊以  
文昌建六官之聯武部司五兵之籍然注擬右列自隸  
於銓曹而筦執中權益顯於樞府事較古而既異職在  
今而獨清是宜帝簡之難允屬重塗之舊恭惟判部侍  
郎氣嚴而中裕體粹而外充練達本朝之舊章洞明當  
世之大務許身稷契既屢抗於忠言納君唐虞將登帝  
於盛治遽懷永退殊鬱師瞻仙殿邃深班首通於論議  
神畿密邇職薦布於教條亟聞召節之頒歸備便朝之

對果真除於亞旅益茂論思佇進翊於煩機用宏經濟  
其猥縻漕計竊聽綸音阻陪賓客之趨曷勝寤寐之喜

賀史刑侍啟

范致能

伏審輟從宰屬擢貳秩卿監古治以象刑式司邦禁列  
從臣而第頌允穆朝僉休聲所同和氣自至竊以得賢  
可及堯舜建官尤重於諸曹致治庶幾成康措刑宜先  
於庶務匪疇間世之碩德孰贊熙朝之極功恭惟判部  
侍郎毓粹自天研幾於聖濟世之道淵深而長流華國

之文芒寒而色正守險夷之一節更榮滯之兩塗上既  
察於忠純時遂加於眷倚南宮之分六職既藉彌縫北  
省之出萬機更資考覈果膺殊渥亟踐邇聯豈特取儒  
雅而勝法家抑亦積譽處而登政路某久睽英表遠庇  
餘休第切忻於得輿阻趨慶於成廈進臯陶之淑問已  
陟禁嚴用方叔之壯猷佇躋樞要

賀錢工侍啟

張欽夫

誕揚宸命擢貳冬官天生五材盡謹民彝之用國有六

職尤難執事之精朝著得人士心交慶恭惟某官氣涵  
剛大行道中庸傳師友之法言淵衷有自明國家之大  
體表裏無遺方賢業之時升固貴名之日起叅陪諸彥  
久從藏室之游舉正宏綱式助文昌之政果由迪簡進  
簞高華峻從班於貳師之聯付邦土於起曹之重將展  
近臣盡規之益且觀知者創物之能文武可尋方急備  
脩之效元戎罕及坐期精巧之功某遠託餘光欣聞異  
數屬自縻於符守莫親贊於厦成百工惟時既啟其凝

之治一德咸有行攄自任之心

賀姜工侍啟

張安國

伏審祇奉贊書擢居起部神畿穰浩既久賴於將輸仙  
禁邃清宜進聯於獻納有識交頌不謀同辭竊以天生  
五材民斯並用國有六職工乃與居稽前後以建官設  
貳卿而分職恭惟判部侍郎典刑前輩輔弼名家早著  
宏猷布在公議挺松栢後凋之節蘊著龜先見之明與  
旬行都特備光華之遣寶儲延閣屢膺清切之除果䟽

渥於嚴宸亟陞華於亞旅國家閒暇必先械器之脩朝廷論思方盛謀猷之告某久睽崇伋遠托餘輝茲傳成命之頒尤倍常情之喜以辨鼓器姑暫總於百工惟簡帝心佇峻躋於八座

承轄

左丞

右丞

賀王左丞啟

秦少游

伏審光奉明恩進升左轄伏惟慶慰恭惟某官夙種間氣早擅英聲學窮游夏之淵源文列班揚之伯仲周旋

不撓出處可觀共推天下之中庸自得賢人之簡易其  
退也如陂萬頃撓不濁而澄不清其進也若火一然用  
彌明而宿彌壯大任斯降貴名益昭曉達吏情戴胄旋  
更之二轄潤色儒術平津即致於三公某辱在陶鈞

云云

賀張左丞啟

石敏若

妙呼吸百家之學久代王言奮經綸四海之才進陪國  
論賢者在位君子得輿帝曰往哉汝諧人亦喜而不寐  
恭惟某官斗間異氣天上謫仙進止輝華神氣高邁飛

黃汗血卓為奔逸之孤標慶雲景星自是太平之美瑞  
鰲山路遠鵬翼風高越執政機翁從人望紫泥封詔明  
天子之絲綸黑髮黃金大丈夫之仕宦非特搢紳領袖  
蓋作朝廷羽儀某身於造化間酌酒為中外慶一官  
而旅空持燕厦之私心萬益成陰莫綴龍門之賀客

賀劉左丞啟

任元受

伏審自叅機政益著勲勞萬微資告后之猷四海仰躋  
民之德式昭眷寵增煥岩廊伏惟慶慰恭以某官博大



高明忱恂亮直學貫九流之浩博文雕萬寶之英華惟  
經濟有為之才足以酬酢事變惟剛方不屈之氣足以  
聳動搢紳論者徒仰其調一之功人皆莫見其施設之  
跡少酬賢業薦躋網轄之嚴益簡上心即正公台之重  
某久塵委使素辱知憐獲欣聽於吉音方夙馳于遠塞  
徒有蔭雲之幸莫殫賀履之誠

賀李左丞啟

汪彥章

伏審策言進居丞轄精忠貫日正二儀傾側之中凜氣

橫秋揮萬騎談笑之頃國須賢立天為時生恭惟某官  
厚德鎮浮英才經遠得文武弛張之樞要獨運胸中明  
古今治亂之淵源不專紙上爰自踐揚之始每勤獻納  
之忠老成既有於典刑天下想聞其風采昨屬殊鄰之  
擾上貽當宁之憂夕烽既徹於甘泉清蹕將臨於汾水  
惟公夙夜與圖存亡挺身六品之卑抗議九重之據留  
家誓死軟血書詞清大變於胚渾轉危機於呼吸暨干  
戈之指闕爰桴鼓以登陴義動三軍人皆奮死氣吞異

域敵輒請盟身雖九殞而一生國則崇朝而再造昔李  
晟子儀之功高矣而未嘗空策張良謝安之謀至矣而  
初不臨戎永惟元勲曩絕前古既名高而衆嫉乃讒就  
以身危士訟公寃亟舉幡而集闕下帝從民望令免胄  
而見國人薦經艱難益見奇偉方主上大明之今日實  
邦家希濶之昌朝欲庶賢同建於事功非雅望孰為之  
師表將萬世維持之是賴何一時康濟之足云某久託  
餘光欣聞盛事雖無緣進旅退旅陪賓客之後塵豈不

能特書屢書續山林之野史岩廊多暇歲律方熙願精  
寢膳之調用副華夷之望

賀梁左丞啟

楊成功

伏承顯被制恩進登丞轄對裁國政均任柄塗不謀同  
辭有識相慶竊以出納王命允惟喉舌之司綱紀天臺  
實揔樞機之務是為高選以屬異人恭惟尚書左丞學  
術淵微稟姿閑博溫如清廟之器屹然大厦之才早步  
儒林徧天祿石渠之選晚登禁路極玉堂金馬之榮雋

譽藹然僉言藉甚是宜降之大任發舒經濟之謀何難  
出而有為協贊太平之運果膺妙簡大慰輿情密勿廟  
堂已丹青於神化調和鼎鼐佇登冠於鴻鈞某早陪寂  
寞之游相忘形體之外鮑叔知我肯掩夷吾之非匠石  
運斤嘗云郢人之堊賢愚之出處既異中間之書問莫  
通念麋鹿之難馴分江湖之終老顧南隅之甚邈望東  
閣以何期思舊敢懷寓言何極

賀王左丞啟

李清叔

伏審進班上轄總職文昌凡沐素知舉增劇扑竊以上  
聖撫運函生底寧法度冠于三王德澤橫乎四海固嘗  
歷數於在昔以為莫盛於當今仍得超世之鉅賢與贊  
經邦之遠業伏以某官學窮道奧文粲國華納忠上前  
通變適萬事之利馳譽天下明俊為一時之光宜蒙眷  
於中宸特升榮於左輔某側聆褒命允協師瞻其在懽  
愉罔殫數叙

賀李左丞啟

陳師禹

被帝簡之溫文進天臺之左轄垂衣舜世方輸製錦之才體鼎周家果借調羹之手大厦成而燕雀賀陰雨膏而黍苗興凡在甄陶孰不鼓舞竊以尚書者萬機之樞會貳丞者百職之綱維於以糾正官聯於以肅清廟憲賢而戴胄僅以彈舉顯直如常景纔以鯁亮名恢恢有餘地者百無二三斷斷無他技者十常八九欲望重一時之選須身兼萬器之能當有偉人出膺巨用伏惟左丞天人先覺河嶽上靈有可大之業而持之以謙沖有

克壯之猷而嗇之以卑晦偶天地亨嘉之遇從風雲會  
合之期以忠義親結主知以直方務盡臣道陸賈聲名  
藉甚於朝右吾丘智畧輻湊於上前薦厯東曹素重公  
方之譽進登廊廟果膺修整之稱澄百官之流品而人  
無間言統庶務之淵源而事有成績當今之世舍孟軻  
氏其誰北斗以南惟狄仁傑而已至公存乎宇宙清議  
藹乎鄉閭士論僉前輿情共慶如某者江湖寸梗泰山  
一塵自憐樗櫟之才得依桑梓之庇矧相府之鈴不沒



或許進言屬東平之幕初開頗聞奏記得不編摩重訓  
呈露巴音代雉贄以脩名殫鼠能而自効瞻南山之巖  
石積有歲年活東海之巨波期在朝夕誓將謏薄辱在  
品題

賀吳右丞啟

秦少游

光奉明恩進升右轄伏惟慶慰恭以某官抱英傑之器  
屬休明之期智無不照而御之以寬學無不窺而守之  
以約待時藏器未嘗枉尺而直尋肆筆成書惟欲琢磨

而復朴風采凜乎其可畏議論坦然而易行俄鑿枘之  
相投遽囊錐之穎出擢承御史人無間言進轄文章朝  
有政事面折廷爭已開國士之風內平外成行覩大儒  
之效某叨分符

云云

賀吳右丞啟

劉子駒

拜命中宸分聯右轄正人既進朝廷之勢益尊大道將  
興天下之民斯幸某官秉心直亮學古粹深常一志於  
險夷恥因人而進退不可則止懷著龜先見之明於義

也剛挺松栢後凋之操屬大明之紹服攬羣俊以在朝  
間自西州入升內相謂輔世必忠賢在上而順民惟政  
事為先總正臺綱共謀王體六官成績方注意於名儒  
萬世永圖將登庸於真相

賀梁右丞啟

周子充

祇膺恩制進貳宰司伏惟慶慰竊以國家正尚書之名  
以摠錄萬務高丞轄之任以糾正六官既叅台鉉之尊  
乃付股肱之寄眷倚斯重體貌加隆猗歟偉人卓當上

意恭惟某官素韜賢業雅負英才以謨謀忠蓋世其家  
以器度恢傑名於世始終著績出入宣勤果膺當宁之  
求進筦中臺之峻恢張王體何止國富而兵強翊贊帝  
猷將見禮興而樂舉繁我哲輔實慰民瞻某叨把州麾  
介居江國史標循吏自愧於前人頌播賢臣親逢於今  
日忻踰踴躍實倍常情

賀李右丞啟

龔實之

伏審榮被帝恩入提政柄宿儒登庸興頌交歡伏惟某

官德蹈中和識窮要妙可大有賢人之業不倚居君子之強立乎朝廷風采聞於當世見之行事膏澤下於斯民惟丞轄之近司實綱紀之重寄果膺高選式副具瞻行觀帝載之熙進秉國鈞之重懋恩可待公論攸歸某限守藩符阻趨賓館欣頌之懇倍萬常情

賀呂右丞啟

王晦叔

伏審光被制綸顯司政轄上副帝心之拱俟下俞士論之僉諧成命初傳輿情胥慶恭惟某官雄文華國敏識

際天異眷從容步武屢驚於蓮燭殊私簡注姓名久覆  
於金甌果膺體貌之隆進貳鈞衡之峻明良千載今古  
一時廟廊隆九鼎之基象緯炳六符之色某叨陪寮案  
幸託聲光未遑慶牘之修先沐謙函之辱舜官拜首允  
惟百志之熙周輔同心坐底萬物之治第深欣抃曷究  
感私

賀王右丞啟

王季高

伏審登進儒宗叅陪政路重熙累洽允惟一德之相求

聚精會神盛矣千齡之罕遇綸言誕布輿論祇惟恭惟  
某官問學際天謀猷映世維山仙系傳鶴望之風流淮  
水家聲擅烏衣之人物鳳閣將荷於西省鑒坡視草於  
北扉直將追三代之文章豈復論兩京之制誥至若進  
聯四近入贊萬微朝廷渴見於規模措紳想聞其風采  
某早嘗傾慕晚獲披承風雨斯調企仰泰階之明潤棟  
梁已就願承廈屋之帡幪

五百家播芳大全文粹卷十三



欽定四庫全書

五百家播芳大全文粹卷十四

宋 魏齊賢

葉 茶同輯

賀啟

都承

賀除都承啟

張安國

伏審八覲清光進膺華渚通班延閣護雲漢昭回之章

列職機廷承夙夜宥密之命有職交頌不謀同辭竊以西清次對為侍從之臣矧奉徽皇之寶訓右府贊謀用儒學之士實遵神祖之洪規併授真能蔚為異數恭惟都承待制志閎而識遠行峻而才高早被簡于宸旒久聯華于禁素屬嬰多事式賴遠猷召節趨來甚副縉紳之望除音亟下果陪帷幄之謨方殊鄰莫測于新情而當宁正圖于遠御操淵雲之精筆妙墨已優華國之辭咎秦楚之堅甲利兵更妙濟時之略某猥縻煩使幸被

餘休但竊欣于得與莫趨慶于成廈周盖得上策暫陪  
戎索之籌唐孰佐中興即預政途之柄

賀余都承啟

楊廷秀

伏審妙簡傑才特疏曠渥通班書殿越陞論譔之華導  
旨機廷寢預謀謨之秘置傳四出頌嘆一新竊以文武  
兼全在今殊少君臣相得自昔尤難倘非負離倫之識  
而一洗空于須臾曷能膺特達之知而萬世遇于旦暮  
是為希濶孰與等夷維持宥密之廷有宣基命粵自熙

寧之載始用儒臣仍兼修書撰次之榮以寵定策亞勛  
之職嗣登近輔實階于此爰繼盛事非公而誰恭惟都  
承問學精微行能高妙河漢黼黻雅優華國之辭雷雲  
經綸深蘊際時之畧親承妙注徧歷華塗樞府簡僚叅  
兩禁鸛鷺之列端闕服采肅九闕虎豹之儀名聲重於  
朝廷言語妙於天下果頒制檢易踐文階贊帝命於壽  
帷夙夜出納亞官儀于從橐朝夕論思某素仰下風欣  
傳新命猥服勞于原隰阻贊善于門墻佇錫儒科酬稽

古辛勤之力更恢賢業贊興邦闕遠之謀

卿監

賀林大卿啟

史天秩

伏審正名文館叙位月卿賢德有光朝言胥允某官秉  
心淵懿造道精微操修得儒者之風進退有古人之義  
頃由直道懇辭風憲之權俄藉雅才近陟朱丹之地出  
充盈於國計入協贊于宰司休有令聲克當睿意直芸  
香之省增耀于儒林董酒正之機試能于卿寺湛恩載

渥顯用崇階下貽彬蔚之辭尤諷謙光之旨永言欽頌  
曷罄叙陳

賀宗正王少卿啟

熊子復

伏審簡在帝宸寵還卿列稽三代之損益密定曠儀數  
百世之本支載修縟典深動儒紳之艷實為從橐之階  
竊以伯臣司宗班既高於九寺舊人圖任望益重於一  
朝恭惟判寺少卿蘊藉醇深規模宏博植學貫三才之  
奧摛詞奪六籍之華天且弗違當今之世舍而誰也人

雖自絕斯文未喪其如予何果契清衷復游華貫某猥  
縻冷職久別光符但竊欣于得與猶阻慶于成厦杜陵  
轉拙晚期堯舜之逢枚臯忍窮小待嚴徐之奮其如詞  
訥莫盡意誠

賀莫少卿啟

洪仁仲

伏審簡由嗣聖擢貳司宗換九列之清班聯六階之華  
選有識交頌不謀同辭恭惟宗正少卿性蘊中和氣涵  
剛大自兩科之連擢既三館之徧游乃踐郎曹遂居卿

職文昭武穆暫司屬籍之繁周誥湯盤行掌訓辭之美  
某猥縻煩使夙荷慈憐阻修慶于崇墉但致誠于竿牘

賀王水衡啟

蘇叔黨

光膺帝制入掌水衡澄清千里之畿民無冤濫渙汗十  
行之詔帝自疇咨伏惟某官道義儲身忠誠許國談經  
術以佐吏事懷仁義以陳王前故出則俾觀民風入則  
緝熙庶績顧大河中國之經瀆表治亂而見于書而水  
官三代之虞衡歷古今而難其選時欲行其所無事又



使謀之于未然寬九重宵旰之憂慰兩河生齒之望循  
名責實為官擇人果見除書允諧舊德消盜賊以安渤  
海旣旌報政之良臨河洛而嘆禹功將繼前人之美某  
久叅屬吏夙被仁風欣太平之得賢覩嘉猷之入告願  
同燕雀遠伸賀履之誠尚借桑榆晚借餘光之末

史掖

左史

右史

賀李左史啟

熊子復

伏審久侍清光進承新渥左垣記事益高雨露之司右

掖代言并下風雷之令定知簡策所載燦于典謨並傳  
何幸斯文有光今日竊以言動必分於記錄賞罰每形  
於訓詞載堯舜之都俞以軌範百世摹商周之盤誥以  
鼓舞萬方粵從嗣聖之重華罕見傑才之兼任間有膺  
於殊簡迄果贊于煩機卓為廊廟之階曼出搢紳之表  
恭惟左史中書舍人昭回毓粹峻極儲精賢闕早冠于  
羣儒冊府久聯於諸俊逮聯從橐俞契宸旒果序陟于  
螭階更兼榮于鳳閣待赤墀而操直筆法遵孔孟之謹

嚴對紫薇而草尺書辭類漢家之深厚天將大任道可  
前知某早際階符輒登牆仞謀猷告內方觀功業之隆  
才俊滿前自愧言詞之拙

賀趙左史啟

洪仁仲

大君有命眷求載筆之臣左史記言爰約繫年之法得  
賢俱要惟衆同歡恭惟某官學探古初識觀物表懿文  
大肆追作者之風流中道不回得正臣之議論早際昌  
辰之吉出叅俊軌之游惟時策牘之官特異廟堂之選

宣精柱下仰鄰北極之尊濡翰螭頭肅對紫宸之仗陪  
一德論思之秘貽三長筆削之規不有深切著明之辭  
孰示出入起居之戒庶因躬覽紬漢家金石之藏當俾  
方來見黃帝盤盂之作某久瞻盛德方托餘光自縻符  
竹之間阻慶門墻之下勸善懲惡既收鈐槩之功經體  
贊元即助丹青之化

賀胡左史啟

石守道

伏審妙選振廷直除史掖司存雨露久攝侍于清光渥

照乾坤果特承于新命措紳交頌簡冊可傳竊以聖人  
無為南面恭己大君有命左史記言仰模北極柱下之  
躔遠陋西都禁中之錄天顏咫尺爰卓冠於螭坳雲步  
梯階蓋例遷于鳳閣實基大任庸俾真能恭惟左史舍  
人學造聖傳文追古作宰屬嘗俾于萬務臺端更肅于  
百僚逮復蒞於朝聯宜益堅於主眷辨文武之昭穆既  
列九卿載堯舜之都俞遂躋二史凜凜佚狐之筆飄飄  
班馬之香姑用謹于直書即進頗于密命某猥縻煩使

逖賴餘輝莫陪賓客之趨曷勝寤寐之喜

賀蔣右史啟

代

熊子復

伏審光膺宸簡進踐禁塗聯雨露之近司既書君舉布  
風雷之大號更代王言郵置初傳薦紳交慶竊以言動  
必垂于史策賞罰每形于訓詞堯舜都俞炳于萬世商  
周盤誥鼓于四方非併授於真賢曷追蹤於盛美恭惟  
右史中書舍人受才杰異造理精微文陛奏書擢鼎科  
于早歲容臺議禮亞棘位于明時果隆嗣聖之知亟正

侍臣之選右言注記得孔氏之謹嚴內史除書同漢家  
之深厚某尚拘原隰莫造門牆獻納論思方茂濟時之  
業彌縫輔相更恢經世之圖

史館

賀秦太師修徽史成啟

李漢老

褒表殊勛誕敷顯策二公弘化峻遷左棘之崇當軸處  
中益重上台之望鈞陶所暨鼓舞攸同竊以紀德昭功  
必垂信史立言範世實賴元儒永惟徽廟之纂承仰繼

裕陵之垂創巍巍其盛既咸五以登三永永之傳宜襲  
六而為七若稽鉅典必屬昌時伏惟某官道妙機先識  
通意表文極商周之灝噩論兼稷契之忠嘉陳洪範九  
疇已協天人之際作春秋一藝更顯筆削之能衆作賴  
其提綱疑論由其折衷文武之道在方策益煥先猷孝  
弟之至通神明昭合上意屬成書之奏御宜異數之揚  
廷緯帝典而敷文華豈獨比良於遷董振天聲而恢境  
宇行將攄憤於高文某蒙眷滋深聞風欣忭魏相條漢



興之事益彰先帝之功太史仕元封之間敢起周南之  
嘆欣躍所至敷深奚殫

賀丞相修國史成啟

熊子復

伏審惇史成書紀先朝之懿績徽章錫命答上帝之殊  
勲清廟有光巖廊增重竊以方策有文武之政敢遏佚  
于前人春秋無游夏之詞皆折衷于夫子洪惟徽廟祇  
述裕陵號令發施雷風鼓舞于萬物德業盛大日月臨  
照于四方治蓋咸五而登三文將襲六而為七若時鉅

典自我真儒恭惟平章僕射相公功大格天才高經世  
文章八相彌綸允合于上心典謀作經粉澤更資于大  
手裁定有叙勒成不刊茲奉寶儲遂申華渚灝灝噩噩  
既叅雲漢之章赫赫巖巖益峻台階之望是為希曠孰  
與等倫某幸托化鈞欣承命冊注心潭府莫陪下客之  
趨屏跡衡門聊附遠方之賀

賀錢大叅提玉牒監修國史啟 黃伯淵

伏審穆宰清朝提綱鉅典鈞衡虛位登庸已斷於上心

粉澤成書述作先資於大手載頌渙號益聳巖瞻竊以  
帝胄久而益繁史例多而貴約周王孫子綿百世之本  
支魯國春秋著一字之褒貶惟聖代並修于大冊必宰  
臣兼摠于羣賢若趙文起以宗卿而纂昭穆之序于祥  
符如呂文靖以故相而董筆削之權于慶厯是昭殊眷  
豈限彛章今當軸尚闕于冢司故提領特資于良輔恭  
惟叅政知院才高命世識遠濟天敦大裕和濟忠懿鼎  
彛之英雄深捷健增文禧翰墨之光早陳契稷之猷薦

被勛華之眷贊經綸于帝席運開闢于機廷匈奴之運  
直百年既息邊隅之警漢家之統接千歲用昭簡冊之  
傳果膺注倚之隆式副總裁之重金匱玉版將勒成于  
一經衮衣繡裳即寵登于三事

賀孔舍人修史啟

呂伯恭

伏審給禮中堂文成頃刻拜嘉西掖望重縉紳豈專儒  
者之逢辰所嘉正人之得路若乃有唐故事兩漢舊儀  
迨至元豐舉行官制刺取六典董正庶工孰非譽髦此

為妙選莪冠柱下常親咫尺之顏濡筆螭頭自是起居  
之注然所譽者其有所試有德者宜乎有言職懋三長  
功收四立故非老于文學安能窺其藩籬某官才藻談  
天聲名隱地采之公論簡在帝心語言獨妙于君房潤  
色終更于東里豈謂遘回三紀奔走四方玉石俱焚同  
驚烈火雪霜大摯獨保歲寒必謂此生永絕江湖之上  
豈期晚歲復陪步武之游人矜文子之同升自嘆馮唐  
之已老玉堂視草行膺明主之臨觀金鼎調元終起蒼

生之素望未容慶謁先辱珍函愧佩之私書言罔盡

賀王舍人兼史院啟

李漢老

命播朝昕恩隆接畫鳳閣目舍人之樣快觀黃麻史官  
重宰相之權兼提直筆時有得賢之慶士歆稽古之榮  
伏惟某官樂奏九韶玉輝千仞勲詞行遠屈宋甘作于  
衙官廣譽離倫曹陸羞稱于童子茂攄賢業連中儒科  
代言已妙於一題通國皆期于三字久徘徊而難進會  
摠攬而彙征海中有蓬瀛作英躔之領袖李下無蹊徑

振公道於銓衡方四禁之簡材為九重而起草煥星日  
文章之麗鼓雷風號令之傳思若涌泉言如出綉虞夏  
之書渾渾耳可以齊馳伊望之業凜凜乎行將有立某  
自睽符采屢變律筭三人同行有我師當攀逸軌千里  
之外曰甸服幸借末光

賀盛屯田兼史館啟

滕子昭

四方上計實領於南宮三署為郎遠從於西漢主文書  
起草者蓋出于妙選掌戶口懸田者素號于劇曹自非

籍甚聲猷嫻練故實述平樂之詞賦飄飄遊天地之間  
挺京兆之容儀堂堂出風塵之外即何以更司容禮趨  
走赤墀之途典校鴻都筆削素臣之傳欽聞成命允謂  
當仁員外學士學殖堅深神鋒耀穎擅東南之美馳譽  
無雙登賢能之書對策第一自翰飛於雲路諒冠映于  
朝倫職佐地官頗版圖之增美經中博士亦綿絕之居  
多矧復膺汗簡之排修奉和鑒之遊豫陪外庭之高議  
次藏室之遺編氣蓋羣英吞雲夢者八九辯摧異學服



稷下之千人人莫敢當無出其右汝南品格固首出於  
月評天祿職司亦久次于官牒爰膺妙簡尤謂美遷麟  
臺仍草于國書雉省共評于事典上應列宿益懸象之  
著明藏之名山乃立言而不朽職業甚重公論攸歸某  
側聽風聲用清心目顧忻愉之所集辱牋簡之俯臨荷  
眷獎之殊深豈引渝之既能

賀晁司諫兼史館啟

洪景伯

光奉聖恩榮加寵命伏惟慶慰竊以周有司諫之職所

以名官唐設大夫之階因而命服處諍臣七人之任超散官五品之榮仍兼史閣之資實聳士林之觀司諫學士瑰琦邁俗純粹蘊中負王佐之偉材擅人倫之嘉譽至誠遇物固璞玉以渾金餘力為文必摘錦而布繡自決科于丹陛便隨牒于四方主父欲厭于官遊賈誼始聞於召對職司直筆削青簡以惟勤班奉內朝服皂衣而已久果上書於闕下旋對策於禁中三道既成推平津于第一萬乘斯覽喜相如之同時遂詔有司亟遷好

爵華袞之職俾効于彌縫名山之書再加于論次既臨  
軒而廷見仍賜服以褒崇朱紱被躬式將旌德嘉魚發  
詠用慶得賢固將大樹風聲克揚職業三進及雷一言  
興邦更張蹇諤之名便歷訏謨之任豈但文石之上為  
鴛鴦之羽儀蘭臺之中正魯魚之偽謬顧惟祝望實異  
等倫

學官

賀路祭酒啟

邵澤民

顯膺綸綍進掌成均當大典之聿全宜寵光之彌渥允  
協士林之望蔚為儒者之榮恭惟某官命世上賢斯民  
先覺學術窺天人之奧文辭摘圭璧之華早為神聖之  
知屢易師儒之任矧朝廷之所務以學校而為先令具  
法嚴化行俗美丁寧重複炳成書於日星詰屈聱牙追  
得意于盤誥惟時偉望主盟斯文多士取正于表儀四  
方願識其風采訖我泮茆咸歌樂育之恩師辟柴愚亦  
造庶幾之域某羈單牢落齷齪庸愚降才不逮于中人

繕性未捐于俗學重念三川之隱放嘗膺二后之招徠  
丘園賁玉帛之光家世負箕裘之責方面墻之為病茲  
拾芥于何功

賀嚴司業啟

趙德莊

疇咨中宸典頌成均教學為先蓋京師諸夏之根本誨  
人不倦惟儒官四海之淵源清議攸歸輿情胥抃恭惟  
某官稟資渾厚體道精深迪知九德之純言斯可法貫  
穿六經之奧傳所未聞比紬冊府之書旋訂容臺之禮

討論故典聿觀四部之新顯設寢儀不待百年之久乃  
眷賢闕之重載惟雋望之求時方君子之大來天俾斯  
文之未喪矧當漢室橋門之盛久虛周官師氏之尊崇  
化厲賢將啟太平之兆回心向道固非俗吏之能佇承  
正助之臨嗣有得與之慶某論交獨晚伏芘方深仰喜  
陽公告諸生之忠孝居慚蜀守除弟子之更繇莫陪賓  
賀之慶徒結神馳之念

宰掾

檢正

左司

右司

賀陳檢正啟

熊子復

伏審簡在宸衷序遷宰屬雖西清邃密少稽禁路之登  
而北省幾微實預化源之出郵傳四達頌嘆一新竊以  
三公在朝宰士獨叅于造命六卿分職都司第督于成  
規官儀雖號於接連主眷已知於殊絕天將大任道不  
虛行恭惟檢正學自家傳才不世出毫端扛百斛之鼎  
胸次容萬頃之陂蚤結隆知既糾違于右府比膺迅召  
遂董正于左曹特疏龍檢之恩首列鳳池之屬攷熙寧

設職之意覈務既專禪宰相代工之謀簡僚斯重佇頒  
寵渥越正從班某逖仰英符踈聞明制光華閩嶠顧已  
幸於續貂騰踏天衢竊尚希于附驥

賀虞檢正啟

熊子復

伏審擢自左曹躋於北省覈中臺之綱紀久簡清衷裨  
上衮之經綸進膺華臚有識交頌不謀同辭竊以熙寧  
創制之新丞相簡僚之重謂都公分聽皆六聯治式之  
已成而宰士通知實二省機政之攸出故此序升之渥



卓為柄用之階恭惟檢正與學家傳懿文古作量淵乎  
而莫測節凜然而自將早陪朱邸之游旋列紫樞之屬  
使軺一去蓬瀛通羣玉之班召節再來角亢冠列宿之  
位果符輿望亟被峻除方將督期會而檢史奸糾愆違  
而裨國是嗣膺制綬平陟從塗某佩德方新贊善實倍  
杜陵轉拙晚期堯舜之逢枚臯忍窮少待嚴徐之奮

賀傅左司啟

熊子復

伏審妙簡宸衷冠聯宰屬董正文昌之緒卓為法從之

階竊以三公在朝必藉彌縫之益六卿分職尤資糾劾  
之嚴矧尤重於左曹每序升於亞旅天將大任道不虛  
行恭惟左司與學家傳懿文古作量淵乎而莫測節凜  
然而自將學者之仰泰山蚤揚碩德郎官之應列宿久  
結清衷果疏寵渥之新佇踐禁途之遽是惟公望夫豈  
私期某猥試冷曹逖瞻崇仞杜陵轉拙晚期堯舜之逢  
枚臯忍窮少待嚴徐之奮

賀丘左司啟

陳君舉

伏審擢從東觀進列都司豈虛峻陟于亨塗此實寢階  
乎大任恭惟某官高文華國勁節端朝是為間出之異  
人宜服不次之妙選道山接武方觀懋蔚之功公府簡  
僚益賴將明之助蓋睿眷已隆于三接則寵光當極於  
九遷遂躋從橐之嚴乃副朝紳之論某曩緣清晤已仰  
高風逮聞除目之流傳益慰素心之傾倒賤事鞅掌曾  
慶牘之未修盛德謙虛忽華緘之下達英華溢目欣感  
銘心

賀丘右司啟

熊子復

伏審選從起部擢寘都司密贊台衡董正文昌之緒益  
隆帝簡卓為法從之階有識相趨不謀同慶竊以角星  
首冠于列宿宰士實摠于諸曹庶務稽違一切糾治武  
元衡之詳整旋陟憲臺白敏中之文辭徑躋翰苑傳聞  
自昔親見于今恭惟右司才備全能識覃衆妙量淵乎  
而莫測節凜然而自將蔚有令名播為公議早妙郎闈  
之選久叅帝所之遊工居六職之聯既煩協助相理萬

機之務更藉深裨佇疏寵渥之新越踐禁途之遽某猥  
縻煩使幸托餘休莫陪賓客之趨曷勝寤寐之喜

爵封

賀吳郡王啟

缺名

伏審舍爵於世聖主深嘉其功裂地而王天下猶恨其  
晚歡騰有衆榮冠當時竊以用兵以來幾四十載帥師  
在外凡六七公孰有父子兄弟相率以守邊致使官府  
都鄙常為之按堵國家所賴威望益高宜備禮以臨軒

并闔門而行賞恭惟某官自授齊鉞隱為長城敵行避其鋒敢潛窺于塞下士卒服其德皆樂屬于軍中頃出武都坐收德順將入關而拓境忽受詔以班師非唯惜功名于難得之機蓋念遺君父以未除之患如聞行路巴人蜀人之有言歷數近年韓王張王之莫及比執介圭而入覲特歌出車以勞還都邑爭先而聚觀櫜楯合語而嘆息舉家之經百戰共謂其難即日而封三侯未足以報併加寵數式表元勲豈與彭越之同功更過汾

陽之異姓世昨東海必傳後嗣之子孫畫像南宮盡掩  
中興之將帥某喜聞冊命阻賀轅門帳御如漢王之居  
想益隆于體貌尊寵于顯宗之傳顧豈限于彛章請今  
太史之屢書傳作宗臣之盛事

賀定安郡王啟

馬德駿

伏審帝庭敷號王社疏恩褒功而勞使臣方進蓬山之  
直崇德以固宗子遂開涇水之封播告邇遐聳動觀聽  
竊以漢興中天二百載業既綿長周封同姓五十餘族

仿敦叙庸有維城之傑蔚為祭酒之尊恭惟某官胄出  
神明任更師帥屏膏粱之習蕭然有寒士之風極翰墨  
之工粹然得作者之體輟將指使襲守宗藩雖甘泉豹  
尾之遊少稽輿望而磐石犬牙之任特簡淵衷佇備元  
戎十乘之容更視泰階六符之象某幸依洪庇欣聽新  
除非劉氏不王既承于顯冊以滕君為長用壯于熙朝  
頌詠既勤拙訥難盡

賀穎王啟

歐陽永叔



顯頌帝制榮啟國封伏惟驩慶恭惟某官純茂凝姿溫  
仁秉哲濟之學問而以廣其業履夫崇高而能守以謙  
蔚然德譽之隆式是宗藩之列遂膺典冊進位真王胙  
之土以建邦實資親屏爵于朝以示衆盖非私恩方寵  
命之初行聽僉言之惟允莫遑伸慶徒積欣瞻

賀宗室除郡王啟

代

李知幾

伏審裂地衍封撫有大邦之衆建旄加寵載兼兩鎮之  
雄茂推同姓之恩永賴維藩之固伏惟某官秉心信厚

率履欽和綽為仙肖之英宜被聖朝之眷廼膺異數進服褒書某承芳牘之見貽佩文光之無數第增勤詠莫悉喻云

賀宗室除郡王啟

代

周行可

伏審進領帥旄顯加王爵推渥恩於近屬敬明命於大廷增一時信厚之風聳百辟觀瞻之美伏以某官傲儀麟趾分派天潢其在文昭之親斯為邦族之最宜膺眷以重戚藩某未偕慶禮之先遽沐謙滕之貺忻銘殊

劇言喻罔殫

賀除嗣濮王啟

梁子輔

伏審增衍王封嗣承濮國重冠戚藩之重榮兼帥纛之  
嚴逖聽嘉音良深抃悃伏以大王性資純裕德履和恭  
素為宗室之表儀最處皇家之親懿屬因聖孝仰念文  
昭發明命于大廷推渥恩于近派首膺異數進服褒書  
某馳慶牘之未遑沐謙勝之先及其于愧佩豈易名言

賀留後國公啟

史載之

伏承茂加公爵榮畫邦封推異數于近宗進留車于閭  
外共深慰憚尤協觀瞻伏惟某官親首國宗派聯考廟  
服溫良之懿行承光渥之眷深某方慶拜嘉亟蒙垂翰  
其為愧荷曷易指陳

加職

賀秦大觀文啟

鄭厚

茂膺眷注渙號王庭峻陟班聯視儀上宰傳聞四海稱  
贊一辭伏惟懽慶恭以某官道德宗工文章盟主箕裘

相業柱石朝家決科獨步于桂林致身橫飛于槐府聞  
詩聞禮訓素承于義方立德立功業果優于康濟有大  
德而必得慨無官而可酬高冠台階榮躋秘殿進大名  
而增重國體昭異數以厭服人心夷夏聳聞赫赫黑頭  
之真相簡編罕見皇皇青史之令名眷倚方隆寵靈未  
艾某自維駑質上託鴻鈞小壘是拘喜徒深于雀躍崇  
墀莫及賀尚阻于鳬趨第切情悰難形拙訥

賀王宣撫加資政啟

邵公濟

顯揚褒制誕告多方極秘殿之隆名示行臺之盛節慶  
流遠服歡重寶鄰玉帳益嚴金城增重在本朝之舊典  
眷前輩之偉人富文忠之通北庭范文正之拊西徼將  
有資于大政必先冠此美稱惟望實之並高視勛勞而  
可繼恭惟某官受天異稟佐帝中興初為御史執法殿  
中適當朝廷尋盟閭外豈但持正論以一助至不辭難  
事而百為上旨親承宥密之地甚邇恩言誕布幕府之  
位偶虛政績既聞召符少緩當分疆以柔敵思閉闕而

1147

賀王大資啟

熊子復

伏審疏恩宸宸陟禁庭正舊弼之寵彛仍大藩之委  
畀郵傳四出閫制一新竊以聖朝熙豐多有間傑溫國  
文章卓為耆英然初辭機務而僅領端明及屢易歲華  
而始遷資政旋果聞于八相茲允謂于前規恭惟安撫  
叅政大資與學研幾壯猷經遠貳巖廊之百揆國勢益  
尊殿海嶠之十連帥權增重果進聯于秘殿即還佐于  
清朝某濫贊將俞幸依封部介圭趨覲佇遂拜於威儀



竿牘虔修敢自通於誠意

賀張端明啟

汪彥章

躬被贊書寵陞秘殿人惟求舊存隆尹正之權威不違  
顏密侍清閒之燕望尊表著喜動縉紳恭惟判府端明  
當世老成中原名士英才濟世兼數器以有餘忠力事  
君更百為而無變爰自得興之始屢恢游及之能潔已  
抱公威肅本根之地獻善宣美政成喉舌之司比疏分  
聞之恩將遂偃藩之佚地方由于君重人已佇于公歸


乃眷行都視天子一所之輿素為大國敵長安三輔之  
繁旋聞騎竹之迎未徙憇棠之蔭宜膺地數以勸憇功  
惟開館于嚴廷實遴才于近列榮光三接獨優儒學之  
名仙路九重更越禁林之寵所以內表四方之極外倡  
九牧之風台衡之任益親政柄之歸可上某久棲樾芘  
欣聽綸音適縻軺傳之行莫綴賀賓之末春秋緣飾既  
施張敞之素聞惟幄雍容尚起留侯之故績

賀陳端明啟

史載之

伏審眷隆舊輔寵復近班禁殿尤清特備燕閒之問宰  
廷方缺佇膺弼亮之圖流傳邇遐聳動觀瞻恭惟觀使  
樞密端明知院妙宗道壺雄師文壇鰲禁摘章翔蛟龍  
而躍虎鳳鴻樞績武閉雷霆而藏風雲既首冠于籌帷  
亦垂躋于揆席遽辭機務殊鬱具瞻晉仰謝安當復為  
蒼生而起唐推裴度豈容即綠野而居果奉渥恩亟還  
遂職告遠猷于丹扆諒契淵衷揚大號于紫宸即膺柄  
任某猥縻煩使幸比餘休莫陪賓客之趨曷勝寤寐之

喜



五百家播芳大全文粹卷十四

欽定四庫全書

集部

五百家拙芳大全文粹卷十五

十六

詳校官編修

臣謝振定

助教

臣常循覆勘

總校官編修

臣

王燕緒

校對官中書

臣

葉蘭

謄錄監生

臣

馬衍宗

欽定四庫全書

五百家播芳大全文粹卷十五

宋 魏齊賢

葉 茶同輯

賀啟

加職

賀王龍圖啟

洪景伯

伏審績著帥垣龍頌帝極虎韜奇秘仍顯南紀之封龍

閣高華遂冠西清之直實階從橐深艷儒紳恭惟安撫  
龍圖瑞世傑才鎮時雅望夙膺妙注垂踐要途握英箚  
之符薦分一道下青冥之越亟率十連果蒙宸衷之褒  
進寓河圖之職諒超一節即踐六聯某早奉外臺逖瞻  
大府莫展仞墻之賀謾馳尺素之誠

賀陳天章啟

汪彥章

寵膺恩制榮陟近班朝論僉諧公望益峻伏惟慶慰竊  
以國朝敷求謨明輔弼之佐必先文學近密之臣諒微

高世之盛名曷副一人之注意恭惟某官師筵舊德藉  
圃清流道術通明冠冕當世詞華穎耀領袖諸儒聊偃  
息于藩垣遂進升于書閣行聞召節入正鼎司某服勤  
小官僻在下邑已託庇存之賜終依陶冶之仁下情歡  
愉未易敷罄

賀汪寶學啟

熊子復

伏審績著坤維龍頒宸極陞冠寶儲之職實階台輔之  
除一札疏榮百城增重竊以大藩總四路之師旅元侯



獨擁于帥旄延閣萃兩朝之圖書學士首聯于從索惟  
精神折衝之益遠故體貌厲節之愈新恭惟制置閣學  
侍郎毓粹昭回儲精峻極早冠大廷之擢久聯清禁之  
班昨自甌閩改臨巴蜀如張文定當至和之際鎮靜以  
綏遠方若趙清憲在治平之間庶平以變舊俗規模兼  
擅于前輩風采凜傳于外夷宜渙明恩以章殊最雲章  
奎畫聊進寓于隆名台象斗樞佇入陪于基命某猥聯  
朝序喜聽除書玉壘銅梁悵莫趨于賓幕介圭赤舄異

即迂于都門

賀芮顯謨啟

周行可

伏審疏渥中宸陞華內閣寶儲寓直寢鄰禁近之班繡  
指趨還獨茂神畿之最  
有識交頌不謀同辭恭惟提刑  
顯謨大卿蘊藉深醇規模宏遠毫端扛百斛之鼎胸次  
容萬頃之波夙妙簡于帝衷久榮躋于卿列寵垂持橐  
偶廻方丈之風任屈乘軺復近長安之日兩躡臨于會  
府三徧歷于提刑玉節宣風既光華於原隰錦囊留韻

復雅擅乎風騷克敦圭璧之修用赴風雲之會某猥當煩劇  
夙荷知憐但竊羨于得輿阻趨慶于成厦使有功見知  
則悅將勞還歸后克聖丕命其承即躋獻納

賀張徽猷啟

黃伯淵

光奉明綸榮陞邃閣伏惟慶慰恭惟某官業資久大才  
抱柔嘉學與探於聖心任重志乎天下由明王敷德以  
懷遠故智者乘時而立功第進禁林尚留漕運畢誠入  
拜諡裕於供軍蕭相受封愛疇于給食佇觀迅召別聽

登庸某 云云

賀廣守加待制啟

胡仁仲

伏承南塞安寧既獲長城之御中宸優眷寵陞延閣之  
華方慚賀牘之未修遽辱珍題之下貺玩詳至再感懌  
交深伏以某官忠結主知德諧人望控百蠻之海道深  
藉淵謀識列聖之奎文近聯法從履此禁嚴之地實為  
柄用之階某拜晤未期詠瞻無斃勉祈珍護密副上懷

賀林待制啟

何子建

伏承宸扆疏恩禁近陞職逖聞顯擢倍切懼悚竊以禁  
域西清廣文內閣傍近群玉左睨延英寶創鬱若以中  
天睿文深然而在筭掌此者兼從論思之地位是者必  
陪卿側之臣用為階梯多至承弼伏以某官學深賈鄭  
思挾常楊歷蘭臺載筆之司更柱史記言之任久翔藩  
會數試政能果就拜于除書固雅宜于素譽某叨蒙眷  
契尤慶寵音先辱滕緘第增銘荷

賀王英撰啟

綦叔厚

伏審疏渥帝宸陞華遷殿示舊臣之亟召還亞旅之彛  
章有識相趨不謀同慶竊以將降大任或勞其形未喪  
斯文人何畏彼是故枚臯小忍而嚴徐終與並進賈誼  
見思而絳灌不能復搖歐公厄于巧誣而典內制于至  
和坡老困于朋讒而承上旨于元祐道豈終否器須晚  
成恭惟宮使侍郎蘊藉醇深規模宏博辭坡入直既久  
侍于王言從橐新除蓋深符于士望暫違清禁既奉殊  
庭果陞麗正之聯佇復承明之職遂陪幾務益展壯猷

某受知殊常別德浸久第贊門墻之喜莫陪賓客之趨

賀沈帥加待制啟

林豈塵

伏審渙命端宸陞班華秘承流宣化雖可為大丈夫之  
榮增秩晉階亦庶幾古循吏之賞郵音遐播輿議允公  
恭惟安撫待制遠識際天宏材緯世文章古人所不到  
事業今日之未聞螭蛸早結于深知華要薦揚于臚仕  
方朝廷匪輕于外任故岳牧專用于詞人張子高之相  
膠東先嚴賞罰龔少卿之治渤海母問鉤鋤勸農蠶於

下車之初戮鯨鯢于安瀾之日青海無聞于傳箭潢池  
不見其弄兵坐收堂上之奇誰是舟中之敵美歸士東  
征之勞寬聖君南顧之憂燕寢香凝豈繼止戈之詠江  
城綠秀何慚賣劍之風課政最以上聞疏寵恩而中出  
八郡喧騰於輿頌九重願借其高名人皆有草木之知  
孰不為燕雀之賀某夙蒙剪拂厚見周稱適欣躍之耳  
聞竟游揚而心喜三十年門牆已遠未嘗聞故人之情  
二千里道路且長不能從賀客之後願為紙筆之間敢



布腹心之言

賀趙憲加秘監啟

孫太冲

茂著顯庸光膺褒典道山玉宇越陞中秘之華漢使繡  
衣仍總外臺之峻官隨望重職以名清恭惟某官靖深  
而秉彛莊重而履坦才豪無敵一洗而凡馬空政妙有  
成四顧而金牛解早由簡拔多所踐揚乃眷閩封屢將  
指使逮領平反之重尤資欽恤之良惟歌頌之方騰尚  
容借冠示論思之有漸姑畀登瀛矧藏室之清途實儒

林之榮遇星應東壁地稱西崑顧平日侍從之臣皆由  
其選在異時宥密之地非公而誰實衆望之當然豈私  
期之獨耳某夙依大庇逖聽新除莫陪賓客之趨但增  
寤寐之喜意傾彌切詞訥奚殫

賀王漕加起居舍人啟

王望之

螭陛記言任專筆削隼旟按部職在澄清所以建使節  
于外臺影朝纓于文陛底慎財賦致軍國於富强昭明  
策書舉春秋之凡例自非蘊析豪之精力負挾天之雄

才聿當虛佇之辰豈副至公之選恭惟起居學士氣衝  
斗極名震京師學通亡篋之書理勝論都之賦一自決  
科漢殿通籍周行出頒詔條允洽二天之詠入奉計最  
亟延三接之恩爰飛步于亨衢久育材于近署次宸章  
於柏殿典秘記於蘭臺諍臣七人夙推蹇諤王畿千里  
嘗督轉輸京坻載集于見糧繁膏固彰于餘地昨以河  
出砥柱如竹箭以奔流郡立東平致金堤之壞決宣房  
未塞夷儀卜遷瓠子興歌正下淇園之竹原田發詠大

懼歷陽之魚暫輟英賢式撫新邑期會簿書之急繕興  
版築之勞祇役惟寅成功甚速水反故道免東海之桑  
田人服先疇識新豐之雞犬永無虞于昏墊實仰賴于  
神明既安堵以阜生將解龜而受代載加命數仍委事  
權當九重注意之初在列郡承風之地海岱之壤俗號  
富饒齊魯之邦氣多舒緩諒宜寬大之詔用躋仁壽之  
期至如奉三尺之竹書克勤刺舉調千金之粒食無事  
誅求此又揜心計于研桑笑霸圖于管樂良史之任聊

為假道之資富民之封固可翹足而待某幸窺除目方切欣愉遽辱長牋過承謙損願言銘待無以喻云

賀漕使加起居啟

邵澤民

竊以古者設記言之官立司過之史職當汗簡固君舉而必書事及剪桐表王者之無戲爰自分漕兩掖通籍九門陪鹵簿于明光出叅法從接公槐于文石入奉內朝最親咫尺之顏實草起居之注自非通丘索典墳之學挺肅恭懿文之資則何以束帶影纓預周行于螭陛

懷銘持槩約魯史于麟毫久屬時英克符師錫恭惟起  
居學士詞源沃日文律融春潁水生賢占荀爽無雙之  
譽漢庭發策得平津第一之科外叅竹使之符歸踐石  
渠之署閱圖書於冊府方討典經幹鹽鉄於縣官遽商  
功利自爾陟諍臣七人之列足太倉九歲之儲靡施刺  
骨之文而庶邦震肅不假析毫之術而內帑充盈率經  
義以治財奉詔條而集事爰膺妙簡聿副疇咨亟推進  
秩之恩更賴當官之業昔張蒼以列侯之重主郡國之

計書杜預以常伯之崇領江淮之轉漕允資餘地兼總  
外臺分南董之官漕運研桑之心術即俟上林朽貫復  
全盛於西京大輅鳴鑾展封崇於東岱便入金鰲之叙  
武揮玉牒之文翹祝之誠實在如此 云云

賀陳漕加直閣啟

毛伯穎

拜寵楓宸陞華芸閣屬公朝信賞之日增外臺持節之  
榮恭惟某官夙被眷知特膺時選方六飛之南駐視百  
粵為近藩協濟軍須實煩心計事尅期而取辦固非一

端下不擾以告成斯為盡美休功藹著優渥宜頌清游  
始寓于瀛洲迅召行趨于天闕某言念崇墉之邇俯慚  
名位之卑面賀無因心馳清切

賀王守加直閣啟

汪彥章

光膺芝檢寓直蓬山式彰牧守之賢益重邊方之寄伏  
惟某官忠嘉濟世儒雅自將渾金璞玉之粹純水鑑冰  
壺之瑩徹一麾敷愍最淮甸之列城五袴作歌仰漢京  
之循吏今日桑麻之野皆異時荊棘之場成績既優寵



光難後芸香群玉之府宜進躡于英躔荷橐大明之宮  
將入叅于邇列某睽離滋久仰止實深曾馳慶之未遑  
辱貽書之先及眷言感愧曷慶敷陳

建節

賀呂相建節啟

蔣子禮

伏審均儀宰席疏寵齋壇成命一頒懽聲四浹竊以裴  
度之平滄景始進於崇階令公之兼邠寧本規于破虜  
未有訂山河於盟府聳旄鉞於戎軒偃簿祠庭間遊廊

廟永惟殊遇盖有德以簡于皇衷仰揆元勛殆無官可  
隆于異數富貴溢世而人不厭精神折衝而國以尊故  
晉室之眎台司止叅驃騎而漢侯之奉朝請靡建將牙  
赫然王靈萃我哲輔恭惟某官股肱真主冠冕庶工忠  
順勤勞類孔明管樂莫能過雄深雅健如太史崔蔡豈  
足多既取日于層淵遂擎天而作柱再獲渭濱之兆無  
煩商野之求運契時來更切安危之寄任重道遠但聞  
夷險之同已欣袞繡之歸益侈鼎槐之業某罷柔不武

卷十五  
謬假節以護邊飄轉承流洊分符而坐鎮側聆制綽尤  
激懦棕投老何為每荷故人之戀戀倦飛滋久願棲廣  
廈之耽耽

賀汪相建節啟

汪彥章

誕布制麻榮分齋鉞即公台之舊望陞帝傅之新班恭  
惟某官社稷宗工廟堂元老蕭曹興漢本豐沛之故人  
閔散佐周乃唐虞之盛際浩然去國脩爾周星留萬里  
之山川隔九霄之日月雖聖君軫念不忘附驥以攀鱗

而流俗妨功屢使跋胡而蹇尾憤鬱既極精誠乃通力  
排壅蔽之私入奉清閒之燕植牙建纛坐兼金印之重  
列戟面槐遂至布衣之極由淵衷之感繫故異數之便  
蕃矧黜歛之名區有平陽之望族閱古今之信史千載  
於茲兼將相之崇資一人而已何意孤生之獨運幸蒙  
餘潤以尤多恨違表著之班莫贊門墻之喜炎歆向末  
俊乂居中願調茵鼎之宜行復鈞衡之拜

賀張節使啟

張少瑜

疇庸秘殿錫命齋壇文武兼資益聳朝廷之望威名素著薦隆輦轂之權渙號既頒師言咸穆惟近世將旄之授多一時戰陳之功未有尹天子之一折首叅侍從而能啟元戎之十乘備舉官儀考故事以僅傳由中興而創見恭惟某官學周經濟識洞幾微會有作之亨嘉行所知之光大言忠而諒勳殿陛之履聲教久而明絕閭閻之桴鼓乃者天臨帝籍雲矗王城垂萬年不朽之規舉百世罕行之典不愆于素迄用有成迨茲顯拜之孚

始識宣勞之自調戈蕩節獨高京兆之風尺籍伍符遙  
改龍江之觀主德方厚政柄焉歸某偶屬承輶阻陪賀  
厦濫從蚤歲接冠蓋于班曹終愧珍群望駕鸞于霄漢  
其為傾頌莫盡名言

遷秩

賀李帥遷秩啟

馬朝南

伏審天府第功雲章錫寵顯躋峻陟允答高勲外光帷  
幄之謀內篤聖神之眷式為異數交慰輿情恭惟某官

明照幾先智周事表學識文武之大材兼道德之全自  
任以當世之功名盡繼乎古人之事業內昭王度庶政  
修明外暢天聲四夷屈服惟湟中之新境實隴右之故  
封充國陳漕運之功文淵策戰守之便形勢斯在沃壤  
可知神考御天方昭睿畧泰陵述事遂格休功紛過計  
以中更舉成謀而外棄皇靈震疊武旅驩趨勢固易于  
建瓴歸遂同于縱壑金湯未改號令更新凡在闢國之  
勲盡出指蹤之效宜光寵渥增賁賢勞冠千載之光榮

聳四方之觀聽某久塵庸使夙愧空殮獲聞三捷之音  
莫預衆賓之後喜深載躍望極增懷

賀黃漕遷秩啟

謝才叔

伏審祇承寵渥峻陟華資叙舜庭考績之優詔商典懋  
官之舊遐聞成命增激懽悰恭惟某官器宇靜深智猷  
通博遇事有不疑之決在公惟匪懈之憂百吏承風凜  
若神明之畏九年足食出于指顧之餘天子重稱其才  
朝廷無出其右果膺殊眷特拜茂恩竦簪紱之榮觀契



明良之嘉會使軒留愛已夙慮于公歸廟鼎元勲將默  
符于帝賚即聞迅召入覲嚴寅某素托恩庥阻趨威  
重

賀張漕改秩啟

史天秩

驟駕轉糧久膺煩使飛郵傳命新陟崇階榮居六品之  
班光動二星之彩賓朋慶慰郡國歡呼凡屬獎題率增  
抃蹈恭惟某官天球薦彩岳鎮儲靈鄉評群行之宗筆  
陣萬人之敵鵬程易舉驥足難留閱樞府之牙籤卷王

宮之絳帳便親東海出開千里之藩持節夜郎入奏九年之績英聲騰達夙望巍昂正柱下之法冠明陝中之刑鼎肅將忠敏歷踐清華尚虛西掖之除復領東洲之漕雲梯石棧不辭蜀道之難流馬木牛遠訪草廬之製惠風扇物游及發硎奮澄清之志於攬轡之中講水陸之運於鑿潭之始蘇一方之疲瘵權萬貨之低昂非獨觀風聽吏之才又能善富國強兵之術久勞心計簡在膚思降一札之璽書加三年之課最優加賞典榮進勲

階汪洋玉冊之恩炳煥繡衣之寵表微一級雖含覽鑑  
之情車相九遷應有封侯之地甘泉上計宣室見思即  
趨曳玉之班行慰彈冠之望某禮庭餘子管席舊遊棲  
遲黃綬之蹤偃仰赤衡之影官資冷落幾成梅福之狂  
容路羈愁常恐長卿之病追想下車之揖側聆增秩之  
榮搦管操觚望風引領金蘭不改既懷世契之私燕雀  
有依敢後履成之賀

賀宋漕改秩啟

俞仲舉

被恩行旆進秩禁階仰惟帝寵之申用慰賢勞之及屬  
叨存記倍切忻愉恭惟某官氣渾南溟望高北斗網提  
鄉校應樂育于菁莪器用人材助能官于棫樸紛若舟  
車之運裕然府庫之充中外一辭公私兩利風霜凜冽  
已三換于乘輶雨露霑濡復五遷于寄祿佇由舜陟入  
奉堯俞垂紳黃闥之嚴正席紫垣之峻伏念某誤緣礦  
質暫假銅章染翰通誠預托冥鴻之去承顏稱慶即瞻  
畫鷁之歸

賀蔣漕遷秩啟

馮圓仲

茲審第勞六勲遷秩二等欽聽寵榮之數尤深欣抃之誠伏以某官學博古今美兼名實歷幹四方之劇固知庶事之原方提六路之舟車以足上都之金穀俾圖言狀上結淵衷之知刻景成功首聞慶賞之逮某素蒙眷愛亟沐謙勝其在銘藏罔殫敷喻

賀邵憲遷秩啟

王昭祖

八寶慶成方霈恩于率土千齡啟運俄進陟于榮階聞

嘉報之誕敷激懦衷而增抃恭惟某官德溫荆璞量溢  
黃陂該通古君子之風磊落大丈夫之器文章餘事舊  
借飛聲功業顯途今看濶步暫屈星軺之重出持霜憲  
之嚴天網恢恢幸寬容而有制王民皞皞服平允以無  
冤累對昌辰茂膺天命南州總使已聞孔席之溫北闕  
思賢即竚曹裝之促某効官雖遠蒙庇極深景仰崇墉  
恨無緣於接武發揚寒緒竊有望于知音暑氣正炎薰  
風尚細願智恬之交養庶福履之來綏

賀王倅遷秩啟

孫賓老

仰承天寵榮進官聯考績中朝正星郎之班序增榮別  
駕重侯屏之威儀凡屬庇休舉欣鼓舞恭惟某官忠誠  
許國仁厚存心巖巖然烈丈夫之規模郁郁乎士君子  
之蘊藉早膺簡注茂建勲庸亘源遠而流長至陰施而  
顯報薦陞華秩旋陟要津頒號令于九重騰歡聲于千  
里士民慶抃草木光輝暫出題輿寧久陳蕃之坐佇膺  
前席式邁賈誼之歸某備數下僚棲身鉅蔭共裁竿牘

聊陳賀燕之誠  
跂望門闌莫預賓鴻之列

賀鄧倅遷秩啟

梁子輔

宣威玉壘克收平寇之功  
通籍金閨庸正策勲之典式  
頒明命允協輿情伏惟驩慶  
恭以某官識宏而深才大  
而遠介圭之錫申伯  
睿眷愈隆袞衣之迎周公  
僉謀胥協果膺溫詔入侍  
嚴宸六經之道同歸聊資  
讜論五帝其臣不及遂集  
大勲四征弗庭一戰而霸  
某受恩云舊趨覲尚稽喜  
聞琳館之開當遂洪鑪之託



賀丁教授改秩啟

李清叔

竊以師筵榮陞京秩命出九重之輿名叅八品之崇屬  
荷眷憐倍深喜躍恭以某官文鋒穎脫經筭宏深美哉  
君子之儒妙出聖人之域偃然絳帳小鳴未究于大鳴  
紛若青衿後覺用資于先覺果膺顯渥峻陟榮階選調  
曩居十九年之日月宦遊今遠九萬里之風雲佇從帝  
簡之優允列朝僉之望願惟屬末幸託隣封念征棹之  
方還覺慶緘之已緩雖蒙豐照未免包羞

賀張幹改秩啟

李仁甫

被恩宸檢通籍朝闈聞家報之誕揚激懦衷而增抃恭  
惟某官誠明貫道純正飭躬早從師席之嚴擢貳使星  
之照一經決第聲華方動于元符八品疏榮位貌果崇  
于大觀茲聞捷步即看橫飛屬緣冷局之拘阻奉高門  
之慶傾風徒切握管奚宜

被召

賀趙丞相被召再相啟

毛伯穎

伏審鋒車入覲對揚天子之光魁柄再專增重本朝之  
勢璽書誕告輿頌交歡竊以無競維人以勞定國唯君  
能制命堅佑賢輔德之誠則相亦有終致興衰撥亂之  
效將紹隆于休運必先契于良圖百姓與能樂宸衷之  
求舊萬邦為憲惟素望之所歸懿茲元臣光我盛舉恭  
惟某官學通倫類性迪中和達可謂之天民每期兼濟  
含章以從王事動不辭難自膺夢卜之求獨運陶鈞之  
化裴度制千里之難綽有成謀陳平遂萬物之宜不勞

餘蘊推誠心公道而人情自服加深思遠慮而國勢愈  
尊閑勞暨請於藩垣僉論難掩於袞繡果膺詔綽歸總  
政機頌渙號于丹墀簪纓聳動壯威聲于紫塞牧圉妥  
安佇光闡于淵謨以宣昭于盛業受彤弓而揚休命晉  
侯觀三覲之儀錫秬鬯以告文人召伯獻萬年之頌成  
功之懿振古莫倫某素被眷知喜聞登用遙賓僚于東  
閣尚阻瞻承躬觀課于西疇但聞歌詠

賀趙丞相被召啟

毛伯穎

冕旒注想嘉召伯之有成棟幹倚崑從韓侯之入覲侍  
金華之勸講高玉陛之謀猷民具爾瞻再運鈞調之化  
帝思俾乂遂成底定之功方當休運之開宜有繁禧之  
介恭惟某官學窮道奧智測事機當軸處中美化行乎  
邦國坐籌決勝威謀憺于羗戎方先獻社之勲遽請偃  
藩之樂赤縣神州久稔陸沉之禍皇輿翠蓋未還螻蛄  
之宮悼心驚歲月之除屬目有山河之異鑿門推轂方  
寄重于藩垣亂轍靡旗反大侵于境土無救溝隍之昏

墊空煩宵旰之焦勞天啟宸衷肆登庸于舊德朝推素  
望嘗展盡于成謀穆然宣室之思篤此翹車之寵萬事  
不理智將問于胡公四方是維任宜專于尹氏恭惟某  
官斯文矩矱吾道淵源崑玉秋霜挺立朝之節槩太山  
北斗為後學之表儀鯉庭躬詩禮之傳龍鄉推人物之  
懿蘭臺編削踐班馬之章程鳳閣縵綸邁常楊之典則  
司版圖于民部顓尹正于天畿忽驚魏闕之雰雰能奮  
秦庭之涕泣千乘取信獨推季路之言萬人雖多不室

孟軻之勇心既堅于忠謹事罔擇于危疑排難解紛不  
受魯連之賞毀忠蔽信猶惟無極之讒饒羞安彩服之  
歡名字有金甌之記果再光于圖任以虛佇于弼諧帝  
曰俞哉久深知于劉向民之望也願無出于謝安紳綬  
多附駿之誠餘艤有登仙之望塤篪伯仲同節奏於大  
韶酥酪弟兄助調脲于列鼎流音徽于簡策著勛伐于  
旂常與古為徒自今以始某誤叨英眄似有宿緣悴句  
短章首得拜龐公於床下稠人廣衆獨蒙識孟嘉于坐

中雖抱揚雄不激當世之愚頗負馮衍少事名賢之志  
喜聞新命殊激懦衷立名願附于青雲求士必先于白  
屋彈冠結綬喜聞衆正之塗搦管操觚願紀太平之象

賀劉太尉被召啟

毛伯穎

芝檢遐頒楓宸促覲安民人而定社稷利久重于國家  
說禮樂而敦詩書望宜歸于謀帥璽書誕布輿頌交歡  
恭惟某官天挺雄沉神資果毅星軺出使已躬叱馭之  
勞玉帳論兵獨奮請纓之志自遭罹于國難尤宣序于



家聲世濟功名幸西平之有子力清氛祲豈秦國之無人果膺鼙鼓之思載雋弓旌之寵聚米而為山谷竚聞入告之嘉謀折箠以答羌夷克贊中興之不績某從游茲久欣抃實深拘輟簿書莫備巾車之役激昂銘槩願操銘鼎之辭

賀邵尚書被召啟

毛伯穎

薦膺溫詔促覲嚴宸丹宸注心俯契疇咨之望黃扉虛位竚觀登用之榮民具爾瞻帝思俾乂將永清于寰宇

期大闡于經綸竊以右序有周偶值中微之運系隆我  
漢實開再造之基能整天綱必翳人傑一昨初罹世變  
孰主廟謀狐裘可歎于誰從玉鉉不聞于在上惟大信  
可以服戎狄乃偷一切之安惟至誠可以格神明或昧  
三無之奉狂瀾既倒蔓草難圖致使赤心運千變萬化  
于掌上獨憑齋斧罹六韜三畧于胸中成此雋功每見  
有為而必就膺茲異數尤恨無官而可酬眷注權輿寵  
光雜沓某自惟鰥品久賴鴻私諦觀綸綍之訓詞心旌

已動莫側門牆之賀履顏甲彌增喜頌惟深名言罔既  
賀劉侍郎被召啟

毛伯穎

茂膺芝檢從覲楓宸大冊高文即踐鰲峰之峻贊元經  
體佇觀鳳沼之澄聳動縉紳計安社稷竊以國家垂萬  
年之統業儒術為一代之規模號令教條意悉歸于忠  
厚公卿侍從選咸自于詞章用能跨虞夏之彌文陋漢  
唐之雜霸爰是熙寧法弊始用奔走及事之人宣和政  
驕遂成阿諛順旨之俗指清談而廢務斥理學於空文

鷹擊毛鷲既毒于黎元火及崑岡遂焚于玉石卒然大  
變何忍勝言尚賴九廟擁神靈之休萬方惇忠厚之澤  
勃興睿主再造宏圖八年于茲可謂櫛風而沐雨四郊  
未靖難于採木而削金蓋緣執事之臣未燭本原之旨  
長槍大劍雖云救世之便宜厚賦深刑未免斯民之愁  
痛效晉臣東此輩於高閣談漢祖溺諸客之儒冠憫然  
自高無復師古鑿門推轂方寄重於藩垣靡輟亂旗反  
大侵于境土無救溝隍之昏墊空煩旰食之焦勞天誘

宸衷肆登庸于舊總朝推素望宜褒顯于斯文仰禪聖  
謨大變頹俗必得國僑之辭可以服晉趙良之文可以  
抗秦賈誼陸贄之才猷洞明國體李膺劉蕡之學術切  
中時機莫如我公稱茲盛舉恭惟某官景行先哲博極  
羣書窮游夏之淵源煥雲卿之黼黻宏中肆外茹古含  
今虎鳳蛟龍炳韓公之翰墨烟霞草木雄李白之篇章  
叅韶濩之皦純配商周之渾噩橫經東序久聞孔道之  
明視草西垣坐見堯言之布至於激昂萬乘經營四方

引詩書之格言陳宗社之大計開陳切至見玉座之動  
容成效著明宜金甌之注記倘從曲突徙薪之計當無  
逆坂轉圜之艱是膺宣室之思再錫翹車之寵討論潤  
色裨復古之大猷獻替論思訂禦戎之上策遂膺贊列  
光踐階符陳伊訓說命之篇繼烝民崧高之什某用緣  
薄技誤辱隆知摘句分章久服摠衣之訓歌功頌德願  
操銘鼎之辭情動于中言之不足

賀鄭憲被召啟

周彥質

伏審渙被宸俞欽承召札捧綸言之溫密脫炎嶠之荒  
遐喜動高懷戀傾屬部恭惟提刑奉議剛明無蔽仁厚  
有容欽慎用刑獄無一夫之枉中和御俗訟勤五聽之  
詳民無隱匿之情士絕淹回之患歡聲周洽偉績著聞  
已寬南顧之憂果奉西清之對三年使遠有同太史之  
滯留萬里勤歸應嘆主父之見晚佇膺寵異行陟禁嚴  
某夙荷殊私獲聞休命云云

賀張相入覲啟

毛伯穎

授齋鉞以出征獨高妙筭奉介圭而入覲克奠皇居宗  
社尊榮人祇悅豫既多受祉方歌吉甫之歸克和厥中  
允賴君陳之訓世爰資于哲輔天宜錫于繁禧恭惟某  
官廣大精微溫良恭儉以康王國久建晉侯之勲用格  
皇穹孰高伊尹之德自峻升于袞路每顓決于籌帷布  
令陳辭韙真儒之無敵治兵振旅明大德之克清既誅  
淫慝之鯨鯢遂設功庸之筍簴臨大江而誓衆必翳翊  
戴之功登喬嶽以告功終偶明昌之運願寵綏于福履



以隆就于功名某勉強餘齡撫循遐壤制節謹度唯知  
遵職之勤經體贊元密載濟時之願

五百家播芳大全文粹卷十五